

19/12/1997

Sidang Dewan Rakyat penggal ketiga berakhir

PERSIDANGAN Dewan Rakyat penggal ketiga tahun ini berakhir semalam dengan 18 rang undang-undang diluluskan dalam tempoh persidangan selama 44 hari.

Persidangan penggal ketiga yang sepatutnya berakhir 11 Disember lalu, dilanjutkan empat hari lagi mulai Isnin lalu bagi membolehkan lapan lagi rang undang-undang dibahaskan.

Rang undang-undang yang diluluskan ialah Rang Undang-Undang Perbekalan 1998, Pengurupan Wang 1997, Bank Negara Malaysia (Pindaan) 1997, Perbekalan Tambahan (1997), Bernama (Pindaan) 1997, Kewangan (Nombor 2) 1997, Bil Pertukaran (Pindaan) 1997 dan Perindustrian Sekuriti Luar Pesisir Labuan 1997.

Turut diluluskan ialah Rang Undang-Undang Lembaga Hasil Dalam negeri (Pindaan) 1997, Majlis Peperiksaan Malaysia (Pindaan) 1997, Saraan Hakim (Pindaan) 1997, Perindustrian Sekuriti Depositotot Pusat (Pindaan) 1997, Perindustrian Sekuriti 1997, Kaunselor 1997, Perkapalan Saudagar (Pindaan) 1997, Penagih Dadah (Rawatan dan Pemulihan) (Pindaan) 1997, Pembekalan air (Wilayah Persekutuan) 1997 dan Rang Undang-Undang Tatacara jenayah (Pindaan) 1997.

Persidangan kali ini juga memberi kesempatan kepada Timbalan Perdana Menteri, Datuk Seri Anwar Ibrahim membentangkan Belanjawan 1998 pada 17 Oktober lalu dan menawarkan pakej kedua untuk memulihkan ekonomi pada 8 Disember lalu.

Anwar yang juga Menteri Kewangan turut membentangkan usul kepercayaan terhadap kepimpinan Perdana Menteri, Datuk Seri Dr Mahathir Mohamad dan diluluskan Dewan Rakyat.

Beliau turut membentangkan usul mengenai keadaan jerebu yang turut dibahas dan diluluskan oleh ahli parlimen. Persidangan ditangguhkan sehingga ke tarikh yang akan ditetapkan.

(END)